

60 sekolah sertai debat bahasa Arab

ENAM puluh sekolah dijangka menyertai Pertandingan Debat Bahasa Arab Sekolah Menengah 2008 yang julung kali dianjurkan Universiti Sains Islam Malaysia (Usim).

Pertandingan dengan kerjasama Jabatan Pendidikan Islam dan Moral, Kementerian Pelajaran, akan diadakan selama lima hari bermula 20 Jun ini.

Ia bertujuan menyemarakkan penguasaan bahasa Arab di kalangan pelajar sebagai persediaan ke peringkat lebih tinggi.

Selain itu, pertandingan turut dijadikan medan terbaik melatih dan mengasah bakat kepimpinan dan berfikir secara kritis dan kreatif di kalangan pelajar mengenai isu semasa.

Pada masa sama, pertandingan itu juga dapat mempromosikan bahasa Arab di samping meletakkannya setanding dengan perdebatan kategori bahasa Melayu dan Inggeris seterusnya melahirkan bakat baru yang berkaliber.

Penyertaan terbuka kepada pelajar sekolah menengah kebangsaan

agama, sekolah agama bantuan kerajaan, sekolah berasrama penuh dan Kelas Aliran Agama di sekolah menengah harian.

Setiap sekolah dibenarkan menghantar satu pasukan saja dan penyertaan terhad kepada 60 sekolah pertama yang mendaftar untuk menyertai pertandingan itu.

Johan pertandingan bakal menerima wang tunai RM2,500, Piala Pusingan Naib Canselor Usim, piala iringan dan sijil. Naib Johan pula meraih RM2,000, piala iringan dan sijil.